

全唐詩目

李逢吉

于頔

盧景亮

李勃

孟簡

王仲舒

孫革

汪萬於

何儒亮

李宗閔

韋來微共一卷

徐凝一卷

李德裕一卷

熊孺登一卷

李涉一卷

陸暢一卷

柳公權

吳武陵

韋處厚

楊敬之

李虞仲

張又新

封敖

馬植

李廓共一卷

李紳四卷

崔公信

楊虞卿

楊汝士

陳至

趙蕃共一卷

鮑溶三卷

盧鈞

范傳質

賈碣

陳彥博

唐扶

陶雅

郭周藩

侯列

王質

高銖共一卷

舒元興一卷

盧宗回

周匡物

廖有方

皇甫曙

潘存實

陳去疾共一卷

張蕭遠

李播

王季則

紀元臯

吳晃

鄭還古

獨孤鉉

王初

劉軻

朱晝

滕邁

滕倪共一卷

殷堯藩一卷

沈亞之一卷

施肩吾一卷

費冠卿

蕭建

劉虛白

張復

張勝之共一卷

姚合一卷之四卷

全唐詩

李逢吉

李逢吉字虛舟隴西人登進士第元和長慶兩朝嘗再爲宰相太和中以司徒致仕卒諡曰成其詩與令狐楚同編者名斷金集今存八首

享惠昭太子廟樂章

既潔酒醴聿陳饗腥肅將震念昭格儲靈展矣禮典薰然德馨惜惜管磬亦具是聽

望京樓一作上寄令狐華州

祇役滯南服類思屬暮年閉上望京臺萬山蔽其前落日歸飛翼連翩東北天涪江適在下爲我久潺湲中禁成文教德威清遠頒條信徒爾華髮生蒼然寄懷三峯守岐路隔雲煙

再赴襄陽辱宣武相公貽詩今用奉酬

解鞍辭丹禁揚旌去赤墀自驚非素望何力及清時又據三公席多慙四老祠峴山風已遠棠樹事難追江漢饒春色荆蠻足夢思唯憐吐鳳句相示鑿龍期

奉送李相公重鎮襄陽

海內埏埴徧漢陰旌旆還望留丹闕下恩在紫霄間冰雪背秦嶺風煙經武關樹皆人尚愛轅即吏曾攀自惜兩心合相看雙鬢斑終期謝戎務同隱鑿龍山

和嚴揆省中宿齋遇令狐員外當直之作

致齋分直宿南宮越石虛謠此夜同位極班行猶念舊名題章奏亦從公曾驅爪士三邊靜新贈髯參六義窮竟夕文昌知有月可憐如在庾樓中

奉酬忠武李相公見寄

直繼先朝衛與英能移孝友作忠貞劍門失險曾縛一作作虎淮上安流緣斬鯨黃閣碧幢惟是儉三公二伯未爲榮惠連忽贈池塘句又遣羸師破膽驚

酬致政楊祭酒見寄

初還相印罷戎旂，獲守皇居在紫煙。
安比鄧侯功蔑爾，每懷顯傳一作意悠然應將半俸，
需閭里料入中條訪洞。
天十載別離，那可道倍令驚喜見來篇。

送令狐秀才赴舉

子有雄文藻思繁，韶年射策向金門。
前隨鸞鶴登霄漢，却望沙走塞垣。
獨憶忘機陪出處，自憐何力繼飛翻。
那堪兩地生離緒，蓬戶長扃行旅喧。

于頔

于頔字允元，河南人以蔭補千牛擢累駕部郎中。
湖蘇二州刺史，襄州節度觀察使。
元和初拜司空，尋貶恩王傅。
終太子賓客詩二首。

郡齋臥疾贈畫上人

夙陪翰墨徒，深論窮文格。
麗則風騷後，公然我詞客。
晚依方外友，極理探精賾。
胃合南北宗，畫公我禪伯。
尤明性不染，故我行貞白。
隨順令得解，故我言芳澤。
雲水漾清淨，吳山橫碧岑。
含珠復蘊玉，價重雙南金。
的皪曜奇彩，淒清流雅音。
商聲發楚調，調切諧瑤琴。
吳山爲我高，雲水爲我深。
萬景徒有象，孤雲本無心。
衆木豈無聲，椅桐有清響。
衆耳豈不聆，鍾期有真賞。
高潔古人操，素懷夙所仰。
覲君冰雪姿，祛我滯滯想。
常吟柳惲詩，茗浦久相思。
遠此遠爲郡，蘋洲芳草衰。
逢師年臘長，值我病容羸。
共話無生理，聊用契心期。

和丘員外題湛長史舊居

蕭條歷山下，水木無氛滓。
王門結長裾，巖扃怡暮齒。
昔賢枕高躅，今彥仰知止。
依依曠煙霞，眷眷返墟里。
湛生久已沒，丘也亦同恥。
立言咸不朽，何必在青史。

盧景亮

盧景亮字長晦，范陽人。
少孤力學，善屬文。
德宗時，歷右補闕、銀青光祿，無所回貶斥。
二十年至元和初，召還，遷中書舍人。
詩一首。

寒夜聞霜鐘

洪鐘發長夜，清響出層岑。
暗入繁霜切，遙傳古寺深。
何城亂遠漏，幾處雜疎砧。
已警離人夢，仍驚旅客襟。
待時

當命侶抱器本無心儻若無知者誰能設此音

李渤

李渤字濬之洛陽人少隱嵩山元和中徵爲著作郎敬宗時由考功郎中拜給事中伉直敢言出爲桂管觀察使詩五首

南溪詩

并序

桂水灘山右匯陽江數里餘得南溪口溪左屏外崖巘闢麗爭高其孕翠曳煙邐迤如畫左連幽墅園田雞犬疑非人間沂流數百步至巖巖下有灣壤沮洳因導爲新泉山有二洞九室西南曰白龍洞橫透巽維蜿蜒如玉西北曰玄巖洞曲通坎隅晴眺灘水玄巖之上曰丹室白龍之右曰夕室巽維北梯險至仙窟北又有石室參差呀豁延景宿雲其洞室並乳溜凝化詭勢奇狀俯而察之如傘如傘如樂植支撐如蓮蔓藻井左睨右瞰似簾似幃似松偃竹裏似海蕩雲驚其玉池井嵐飈迴還交錯迷不可紀從夕室梁溪向郭四里而近去松衢二百步而遙余獲之若獲荆璆與地珠焉亦疑夫大舜遊此而忘歸矣遂命發潛敞深磴危宅旣翼之以亭榭又韻之以松竹似譙方丈似昇瑤臺麗如也暢如也以溪在郡之南因目爲南溪兼賦詩以紀之寶曆三年三月七日

玄巖麗南溪新泉發幽色巖泉孕靈秀雲煙紛崖壁斜峰信天插奇洞固神闢窈窕去未窮環迴勢難極玉池似無水玄井昏不測仙戶掩復開乳膏凝更滴丹砂有遺址石徑無留跡南眺蒼梧雲北望洞庭客蕭條風煙外爽朗形神寂若值浮丘翁從此謝塵役

喜弟淑再至爲長歌

第六句缺四字

前年別時秋九月白露吹霜金吹烈離鴻一別影初分淚袖雙揮心哽咽別來幾度得音書南岳知

廬山峨峨倚天碧捧排空崖千萬尺杜鵑長題高士名食堂飯記雲山跡我本開雲此山住偶爲名利相縈誤自負心機四十年羞聞社客山中篇憂時魂夢憶歸路覺來疑在林中眠昨日亭前烏鵲喜果得今朝爾來此吾吟行路五十篇畫說江南數千里自憐兄弟今五人共縈縈素家尚貧雖然廩餼各不一就中總免拘常倫長兄年少曾落托拔劍沙場隨衛霍口裏雖譚周孔文懷中不舍孫吳略大兄一生能苦節夏聚流螢冬映雪

非論疾惡志如霜更覺臨泉心似鐵第三之兄更奇異昂昂獨負青雲志下看金玉不如泥冒道王侯身可爭
却愁清逸不干時高蹤大器無人知倘逢感激許然諾必能薄古留清規念爾年來方二十夙夜孜孜能獨立
卷中筆落星漢搖洞裏丹靈鬼神泣嗟余流浪心最狂十年學劍逢時康心中不解事拘束世間談笑多相妨
廣海青山殊未足逢著高樓還醉宿朝走安公櫓上駒暮倫令籬邊菊近來詩思殊無況苦被時流不相放
雲騰浪走勢未衰鶴膝蜂腰豈能障送爾爲文殊不識貴從一一傳曾臆若到湖南見紫霄會須待我同攀陟
留別南溪二首

常歎春泉去不回我今此去更難來欲知別後留情處手種巖花次第開
如雲不厭蒼梧遠似鴈逢春又北歸惟有隱山溪上月年年相望兩依依

桂林歎鴈

三朝四黜倦遐征往復皆愁萬里程爾解分飛却回去我方從此向南行

孟簡

孟簡字幾道德州人舉進士宏詞皆及第元和中累官至戶部侍郎坐事貶吉州司馬詩七首

享惠昭太子廟樂章

喧喧金石容既缺蕭蕭羽駕就行列緱山遺響昔所聞廟庭進旅今攸設

擬古

劍客不誇貌主人知此心但營纖毫義冒計千萬金勇發看驚擊憤來聽虎吟平生貴酬德刃敵無幽深

詠歐陽行周事

并序

閩越之英惟歐陽生以能文擢第爰始一命食太學之祿助成均之教有庸績矣我唐貞元年己卯歲曾
獻書相府論大事風韻清雅詞旨切直會東方軍興府縣未暇慰薦久之倦游太原還來帝京卒官靈臺
悲夫生於單貧以狗名故心專勤儉不識聲色及茲筮仕未知洞房纖腰之爲憂惑初抵太原居大將軍
宴席上有妓北方之尤者屢目於生生感悅之留賞累月以爲燕婉之樂盡在是矣旣而南轅妓請同行
生曰十目所視不可不畏辭焉請待至都而來迎許之乃去生竟以蹇連不克如約過期命用遣乘密往

迎妓妓因積望成疾不可爲也先死之夕剪其雲髻謂侍兒曰所歡應訪我當以髻爲貺甲至得之以乘空歸授髻於生生爲之慟怨涉旬而生亦歿則韓退之作何蕃書所謂歐陽詹生者也河南穆玄道訪子常歎息其事嗚呼鍾愛於男女素期效死夫亦不蔽也大凡以斷割不爲麗色所汨豈若是乎古樂府詩有華山巖玉臺新詠有廬江小吏相死或類於此暇日偶作詩以繼之云

有客西北逐驅馬次太原太原有佳人神豔照行雲座上轉橫波流光注夫君夫君意蕩漾即日相交歡定情非一詞結念誓青山生死不變易中誠無間言此爲太學徒彼屬北府官中夜欲相從嚴城限軍門白日欲同居君畏仁人間忽如隴頭水坐作東西分驚離腸千結滴淚眼雙昏本達京師迴賀期相追攀宿約始乖阻彼憂已纏綿高髻若黃鸝危鬢如玉蟬纖手自整理剪刀斷其根柔情託侍兒爲我遺所歡所歡使者來侍兒因復前故淚取遺寄深誠祈爲傳封來贈君子願言慰窮泉使者迴復命遲遲蓄悲酸詹生喜言旋倒屣走迎門長跪聽未畢驚傷涕漣漣不飲亦不食哀心百千端襟情一夕空精爽旦日殘哀哉浩然氣潰散歸化元短生雖別離長夜無阻難雙魂終會合兩劍遂蜿蜒丈夫早通脫巧笑安能干防身本苦節一去何由還後生莫沈迷沈迷喪其真

惜分陰

業廣因功苦拳拳志士心九流難酌挹四海易消沈對景嗟移晷窺園詎改陰三冬勞聚學駟景重兼金刺股情方勵偷光思益深再中如可冀終嗣絕編音

嘉禾合穎

玉燭將成歲封人亦自歌八方霑聖澤異畝發嘉禾共秀芳何遠連莖瑞且多穎低甘露滴影亂惠風過表稔由神化爲祥識氣和因知興嗣歲王道舊無頗

賦得亞父碎玉斗

獻謀旣我達積憤從心瘳鴻門入已迫赤帝時潛退寶位方苦競玉斗何情愛猶看虹氣凝詎惜水姿碎而嗟大事返當起千里悔誰爲西楚王坐見東城潰

酬施先輩

襄陽才子得聲多四海皆傳古鏡歌樂府正聲三百百黎園新入教青娥

王仲舒

王仲舒字弘中并州祁人少客江南與梁肅楊憑游並有文名元和初爲職方郎中知制誥穆宗初爲中書舍人終江南西道觀察使詩一首

寄李十員外

百丈懸泉舊臥龍欲將肝膽佐時雍惟愁又入煙霞去知在廬峰第幾重

孫革

一作華

孫革憲宗朝爲監察御史詩一首

訪羊尊師

一作實島詩

松下問童子言師採藥去只在此山中雲深不知處

汪萬於

汪萬於字叔振歙人憲宗時爲江陵戶曹參軍詩一首

晚眺

杖策倚柴門泉聲隔岸聞夕陽諸嶺出晴雪萬山分靜對豺狼窟幽觀鹿豕羣今宵寒月近東北掃浮雲

何儒亮

何儒亮與孟簡同時人詩一首

亞父碎玉斗

嬴女昔解網楚王有遺躅破關旣定秦碎首聞獻玉貞姿應刃散清響因風續匪徇切泥功將明懷璧辱莫量漢祖德空受項君勗事去見前心千秋渭水綠

李宗閔

李宗閔字損之擢進士補洛陽尉累官駕部郎中知制誥穆宗即位拜中書舍人寶曆初進兵部侍郎太和同中書門下平章事遷中書侍郎出爲山南西道節度使尋復秉政後貶死詩一首

贈毛仙翁

不知仙客占青春，肌骨纔教稱兩旬。俗眼暫驚相見日，疑心未測幾時人。閑推甲子經何代，笑說浮生老此身。殘藥僅能沾朽質，願將膏澤永爲鄰。

韋表微

韋表微字子明，擢進士第，數辟諸使府，入授監察御史，裏行俄爲翰林學士，知制誥。久之，遷中書舍人。文宗立，進戶部侍郎，卒。贈禮部尚書，詩一首。

池州夫子廟麟臺

二儀既開，三象乃乖。聖道埋鬱，人心不開。上無文武，下有定哀。吁嗟麟兮，孰爲來哉？周雖不綱，孔實嗣聖。詩書既刪，禮樂大定。勸善懲惡，姦邪乃正。吁嗟麟兮，克昭符命。聖與時合，化行位尊。苟或乖戾，身窮道存。於昭魯邑，棲遲孔門。吁嗟麟兮，孰知其仁？運極數殘，德至時否。楚國寢廣，秦封益侈。牆仞迫阨，崎嶇關里。吁嗟麟兮，靡有攸止。世治則麟，世亂則麀。出非其時，麀鹿同羣。孔不自聖，麟不自祥。吁嗟麟兮，天何所亡？

徐凝

徐凝睦州人，元和中官至侍郎，詩一卷。

送馬向入蜀

遊子出咸京，巴山萬里程。白雲連鳥道，青壁遶猿聲。雨雪經泥坂，煙花望錦城。工文人共許，應紀蜀中行。

送李補闕歸朝

駟馬歸咸秦，^{一作}雙鳬出^{一作}海門。還從清切禁，再沐聖明恩。禮樂中朝貴，^{一作}文章大雅存。江湖多放^{一作}逸，獻替欲

誰論

送日本使還

絕國將無外，扶桑更有東。來朝逢聖日，歸去及秋風。夜泛潮迴際，晨征蒼莽中。鯨波騰水府，蜃氣壯仙宮。天眷何期遠，王文久已同。相望杳不見，離恨托飛鴻。

題開元寺牡丹

此花南地知難種，慚愧僧閑用意栽。
海燕解憐頻睨睨，胡蜂未識更徘徊。
虛生芍藥徒勞妒，羞殺玫瑰不敢開。
惟有數苞紅萼在，含芳只待舍人來。

香爐峰

香爐一峰絕頂在，寺門前盡是玲瓏。
石時生旦暮煙。

白銅鞮

騷裏錦障泥，樓頭日又西。
畱歡住不住，素齒白銅鞮。

楊叛兒

哀怨楊叛兒，駘蕩郎知否。
香死博山爐，煙生白門柳。

春寒

亂雪從教舞，回風任聽吹。
春寒能作底，已被柳條欺。

廬山獨夜

寒空五老雪，斜月九江雲。
鐘聲知何處，蒼蒼樹裏聞。

天台獨夜

銀地秋月色，石梁夜溪聲。
誰知展齒盡爲破煙一作蒼苔行。

送寒巖歸士

不挂絲繡衣，歸向寒巖棲。
寒巖風雪夜，又過巖前溪。

送陳司馬

家寄茅洞中，身遊越城下。
寧知許長史，不憶陳司馬。

武夷山仙城

武夷無上路，毛徑不通風。
欲共麻姑住，仙城半在空。

避暑二首

一株金染密數畝碧鮮疎避暑臨溪坐何妨直釣魚 斑多筒簞冷髮少角冠清避暑長林下寒蟬又有聲

浙西李尚書秦毀淫昏廟

傳聞廢淫祀萬里靜山陂欲慰靈均恨先燒新尚祠

酬相公再遊雲門寺

遠羨五雲路逶迤千騎回遺簪唯一去貴賞不重來

杭州祝濤頭二首

不道沙堤盡猶歎石棧頑寄言飛白雪休去打青山 倒打錢塘郭長驅白浪花吞吳休得也輸却五千家

問漁叟

生事同漂梗機心在野船如何臨逝水白髮未忘筌

雲封菴

登巖背山河立石秋風裏隱見浙江濤一尺東濤水

漢宮曲

水色簾前流玉霜趙家飛燕侍昭陽掌中舞罷蕭聲絕三十六宮秋夜長

和嵩陽客月夜憶上清人

獨夜嵩陽憶上仙月明三十六峰前瑤池月勝嵩陽月人在玉清眠不眠

八月望夕雨

今年八月十五夜寒雨蕭蕭不可聞如練如霜在何處吳山越水萬重雲

觀浙江濤

浙江悠悠海西綠一作看潮驚濤日夜一作日波濤兩翻覆錢塘郭裏看潮人直至一作到白頭看不足

廬山瀑布

虛空落泉一作瀑布千仞一作文直雷奔入江一作海不暫息今古長如白練飛一條界一作解破青山色

嘉興寒食

嘉興郭裏逢寒食落日家家拜掃回唯有縣前蘇小小無人送與紙錢來

憶揚州

蕭娘臉下難勝淚桃葉^{一作失}眉頭易得愁天下三分明月夜二分無賴是揚州

八月燈夕寄游越施秀才

四天淨色寒如水八月清輝冷似霜想得越人今夜見孟家珠在鏡中央

八月十五夜

皎皎秋空八月圓常娥端正桂枝鮮一年無似如今夜十二峰前看不眠

題伍員廟

千載空祠雲海頭夫差亡國已千秋浙波只有靈濤在拜奠青山人不休

買嶠先生

買嶠先生無白髮海煙深處採青芝逢人借問陶唐主欲進冰蠶五色絲

莫愁曲

玳瑁牀頭刺戰袍碧紗窗外葉騷騷若爲教作遼西夢月冷如丁^{一作針}風似刀

寄白司馬

三條九陌花時節萬戶千車看牡丹爭遣江州白司馬五年風景憶長安

相思林

遊客遠遊新過嶺每逢芳樹問芳名長林遍是相思樹爭遣愁人獨自行

寄海嶠丈人

萬丈只愁滄海淺一身誰測歲華遙自言來此雲邊住曾看秦王樹石橋

寄潘先生

至人知姓不知名聞道黃金骨節輕世上仙方無覓處欲來西岳事先生

宮中曲二首

披香侍宴插山花
厭著龍綃著越紗
特賴傾城人不及
檀妝唯約數條霞
身輕入寵盡思私
腰細偏能舞柘枝
一日新妝拋舊樣
六宮爭畫黑煙眉

七夕

一道鵲橋橫渺渺
千聲玉佩過玲玲
別離還有經年客
悵望不如河鼓星

八月九月望夕雨

八月繁雲連九月
兩回三五晦漫漫
一年悵望秋將盡
不得常娥正面看

喜雪

長愛謝家能詠雪
今朝見雪亦狂歌
楊花道即偷人句
不那楊花似雪何

春飲

烏家若下蟻還浮
白玉尊前倒即休
不是春來偏愛酒
應須得酒遣春愁

二月望日

長短一年相似夜
中秋未必勝中春
不寒不暖看明月
況是從來少睡人

讀遠書

兩轉三回讀遠書
書簷愁見燕歸初
百花時節教人懶
雲髻朝來不欲梳

古樹

古樹欹斜臨古道
枝不生花腹生草
行人不見樹少時
樹見行人幾番老

獨住僧

百補袈裟一比丘
數莖長睫覆青眸
多應獨住山林慣
唯照寒泉自剃頭

傷畫松道芬上人

因畫釣臺江山而逝

百法驅馳百年壽
五勞消瘦五株松
昨來聞道嚴陵死
畫到青山第幾重

觀釣臺畫圖

一水寂寥青靄合
兩崖崔嵬白雲殘
畫人心到啼猿破
欲作三聲出樹難

荆巫夢思

楚水白波風嫋嫋荆門暮色雨蕭蕭相思合眼夢何處十二峰高巴字遙

浙東故孟尚書種柳

孟家種柳東城去臨水逶迤思故人不似當時大司馬重來得見漢南春

長洲覽古

吳王上國長洲奢翠黛寒江一道傷見摧殘舊宮樹美人曾插九枝花

却歸舊山望月有寄

年年明月總相似大抵人情自不同今夜故山依舊見班家扇樣碧峰東

再歸松溪舊居宿西林

五粒松深溪水清衆山搖落月偏明西林靜夜重來宿暗記人家犬吠聲

翫花五首

一樹梨花春向暮雪枝殘處怨風來明朝漸校無多去看到黃昏不欲回
麴塵溪上素紅枝影在溪流半落時時人自惜花腸斷春風却是等閑吹
朱霞燄燄山枝動綠野聲聲杜宇來誰爲蜀王身作鳥自啼還自有花開
誰家躑躅青林裏半見殷花燄燄枝憶得倡樓人送客深紅衫子影門時
花到薔薇明豔絕燕支顚破麥風秋一番弄色一番退小婦輕妝大婦愁

長慶春

山頭水色薄籠煙久客新愁長慶年身上五勞仍病酒天桃窗下背花眠

山鷓鴣詞

南越嶺頭山鷓鴣傳是當時守貞女化爲飛鳥怨何人猶有啼聲帶蠻語

鄭女出參丈人詞

鳳釵翠翹雙宛轉出見丈人梳洗晚掣曳羅綃跪拜時柳條無力花枝軟

春雨

花時悶見聯綿雨雲入人家水毀堤昨日春風源上路可憐紅錦枉拋泥
和白使君木蘭花

枝枝轉勢雕弓動片片搖光玉劍斜見說木蘭征戍女不知那作酒邊花
正月十五夜呈幕中諸公

宵遊二萬七千人獨坐重城圍一身步月遊山俱不得可憐事負白頭春
樂府新詩

一聲盧女十三弦早嫁城西好少年不羨越溪歌者苦采蓮歸去綠窗眠
春陪相公看花宴會二首

丞相邀歡事事同玉簫金管咽東風百分春酒莫辭醉明日的無今日紅
木蘭花謝可憐條遠道音書轉寂寥春去一年春又盡幾回空上望江橋

牡丹

何人不愛牡丹花占斷城中好物華疑是洛川神女作千嬌萬態破朝霞
過馬當

風波隱隱石蒼蒼送客靈鴉拂去檣三月盡頭雲葉秀小姑新著好衣裳
金谷覽古

金谷園中數尺土問人知是綠珠臺綠珠歌舞天下絕唯與石家生禍胎
上陽紅葉

洛下三分紅葉秋二分翻作上陽愁千聲萬片御溝上一片出宮何處流
洛城秋砧

三川水上秋砧發五鳳樓前明月新誰爲秋砧明月夜洛陽城裏更愁人
和川守侍郎緱山題仙廟

王子緱山石殿明白家詩句詠吹笙安知散席人間曲不是寥天鶴上聲
和夜題玉泉寺

歲歲雲山玉泉寺年年車馬洛陽塵風清月冷水邊宿詩好官高能幾人
和秋遊洛陽

洛陽自古多才子唯愛春風爛漫游今到白家詩句出無人不詠洛陽秋

和嘲春風

源上拂桃燒水發江邊吹杏暗園開可憐半死龍門樹懊惱春風作底來

侍郎宅泛池

蓮子花邊回竹岸鷄頭葉上盪蘭舟誰知洛北朱門裏便到江南綠水遊

和侍郎邀宿不至

蟾蜍有色門應鎖街鼓無聲夜自深料得白家詩思苦一篇詩了一彈琴

自鄂渚至河南將歸江外留辭侍郎

一生所遇唯元白天下無人重布衣欲別朱門淚先盡白頭遊子白身歸

蠻入西川後

守隘一夫何處在長橋萬里只堪傷紛紛塞外烏蠻賊驅盡江頭濯錦娘

憶紫溪

長憶紫溪春欲盡千巖交映水回斜巖空水滿溪自紫水態更籠南燭花

誇紅槿

誰道槿花生感促可憐相計半年紅何如桃李無多少併打千枝一夜風

題緡雲山鼎池二首

黃帝旌旗去不回空餘片石碧崔嵬有時風卷鼎湖浪散作晴天雨點來
天地茫茫成古今仙都凡有幾人尋到來唯見山高下只是不知湖淺深

宿剎上人房

浮生不定若蓬飄
林下真僧偶見招
覺後始知身是夢
更聞寒雨滴芭蕉
汴河覽古

煬帝龍舟向此行
三千宮女采橈輕
渡河不似如今唱
爲是楊家怨思聲
東白丈人

昔時丈人鬢髮白
千年松下鋤茯苓
今來見此松樹死
丈人斬新鬢髮青
覽鏡詞

寶鏡磨來寒水清
青衣把就綠窗明
潘郎懊惱新秋髮
拔却一莖生兩莖
寄玄陽先生

不能相見見人傳
耀岸山中岱岸邊
顏貌只如三二十
道年三百亦藏年
白人

暖風入煙花漠漠
白人梳洗尋常薄
泥卻爲插瓏璁釵
爭教一朵牙雲落
奉酬元相公上元

出擁樓船千萬人
八爲台輔九霄身
如何更羨看燈夜
曾見宮花拂面春
奉和鸚鵡

毛羽曾經翦處殘
學人言語道暄寒
任饒長被金籠圍
也免栖飛雨雪難
將至妙喜寺

清風嫋嫋越水陂
遠樹蒼蒼妙喜寺
自有車輪與馬蹄
未曾到此波心地
紅蕉

紅蕉曾到嶺南看
校小芭蕉幾一般
差是斜刀翦紅絹
卷來開去葉中安
見少室

適我一簞孤客性
問人三十六峰名
青雲無忘白雲在
便可嵩陽老此生